

CONVENIO DE COLABORACIÓN ENTRE O SERVIZO GALEGO DE SAÚDE E A FEDERACIÓN GALEGA DE ASOCIACIÓNS EN FAVOR DAS PERSOAS CON DISCAPACIDADE INTELECTUAL OU DO DESENVOLVEMENTO (FADEMGA Plena Inclusión Galicia) PARA A REALIZACIÓN DE ACTIVIDADES DE SENSIBILIZACIÓN E MELLORA DA COMUNICACIÓN COAS PERSOAS CON DISCAPACIDADE INTELECTUAL NO SISTEMA SANITARIO PÚBLICO DE GALICIA

En Santiago de Compostela, 2 de maio de 2018

REUNIDOS

Dunha banda, Jesús Vázquez Almuiña, conselleiro de Sanidade e Presidente do Servizo Galego de Saúde, de acordo co establecido no artigo 34 da Lei 1/1983, do 22 de febreiro, de normas reguladoras da Xunta e da súa Presidencia, de conformidade cos Decretos 41/2013 e 43/2013, de 21 de febreiro, polos que se establecen as estruturas orgánicas da Consellería de Sanidade e do Servizo Galego de Saúde, respectivamente; así como co establecido na Lei 1/2016, do 18 de xaneiro, de transparencia e bo goberno, e na Lei 40/2015, de 1 de outubro, de Réxime Xurídico do Sector Público.

Doutra, Eladio Fernández Pérez, con DNI nº , que actúa en nome e representación da Federación Galega de Asociacións en Favor das Persoas con Discapacidade Intelectual ou do Desenvolvemento (FADEMGA Plena Inclusión Galicia), con CIF nº G36620037, en virtude da súa condición de Presidente segundo o acordado na Asemblea xeral e Xunta directiva do 4 de xuño de 2016.

Ámbalas dúas partes recoñécense con capacidade legal para obrigarse e subscribir este convenio, e para estes efectos

EXPOÑEMOS:

1. Que o Decreto 43/2013, do 21 de febreiro, establece a estrutura orgánica do Servizo Galego de Saúde, determinando que ten as funcións de exercer o goberno, a dirección e a xestión de centros, servizos e establecementos sanitarios propios ou adscritos. Dentro da Dirección Xeral de Asistencia Sanitaria, a Subdirección Xeral de Planificación e Programación Asistencial é o órgano responsable de impulsar os programas e actuacións sanitarias e sociosanitarias.
2. FADEMGA Plena inclusión Galicia ten por obxecto a promoción das persoas con discapacidade intelectual ou do desenvolvemento, carecendo de ánimo de lucro.
3. Así mesmo e, de acordo co recollido nos seus estatutos, a federación dirixirá a súa actuación á consecución, entre outros, dos seguintes fins:

- a) Representar aos seus membros ante as entidades públicas e privadas e demais organismos que se relacionan directa ou indirectamente coa problemática das persoas con discapacidade intelectual ou do desenvolvemento.
 - b) Facilitar tanta información xeral ou especializada sobre as persoas con discapacidade intelectual ou do desenvolvemento estea ao seu alcance, fomentando estudos sobre o tema e recadando a colaboración das universidades galegas.
 - c) Realizar campañas de divulgación e sensibilización ante a sociedade.
 - d) Calquera outro tipo de actividades relacionadas coas persoas con discapacidade intelectual ou do desenvolvemento.
4. Que un dos catro eixos estratéxicos da Estratexia SERGAS 2020 é a atención integral adaptada ás necesidades dos usuarios, pacientes, familiares e coidadores: Entre as principais liñas que o desenvolven atópanse:
- a) Mellorar a “consideración” e “accesibilidade” na prestación dos servizos.
 - b) Orientar a estrutura de prestación de servizos cara ás necesidades dos pacientes.

Por todo isto, sendo concorrente o interese das dúas partes, resulta conveniente a colaboración entre ambas, polo que acordan outorgar o presente convenio de colaboración sobre a base das seguintes:

CLÁUSULAS

Primeira. Obxecto e fin do convenio

O obxecto do presente convenio é establecer as condicións polas que se rexerá a colaboración entre o Servizo Galego de Saúde e FADEMGa Plena inclusión Galicia, para o desenvolvemento de actividades que teñan por finalidade a sensibilización dos profesionais do Servizo Galego de Saúde e a mellora da comunicación coas persoas con discapacidade intelectual ou do desenvolvemento no ámbito do sistema sanitario público galego.

Segunda. Actuacións a desenvolver

Son as seguintes actividades:

1. Campaña de sensibilización “Prepárate para entenderme”: Difusión de vídeos entre os profesionais do Servizo Galego de Saúde e colocación de carteis nos centros de saúde e hospitais.
2. Programa Aténdeme-Enténdeme: Visitas programadas aos centros de saúde dunha selección de persoas con discapacidade intelectual acompañadas dun familiar e un profesional da entidade de FADEMGa Plena Inclusión Galicia da que son usuarios. Durante estas visitas transmitirán aos membros dos equipos de Atención Primaria as súas necesidades e características propias así como

algunhas ferramentas para mellorar as habilidades dos profesionais na comunicación coas persoas con discapacidade intelectual.

Terceira. Obrigas das partes

1. A colaboración do Servizo Galego de Saúde no bo fin das actuacións comprenderá:

- a) A posta a disposición das instalacións e os medios axeitados para o desenvolvemento das actividades do programa Aténdeme Enténdeme.
- b) A posta a disposición das instalacións e canles de difusión corporativos para a difusión dos materiais gráficos e audiovisuais da campaña Prepárate para entenderme.
- c) Realizar as modificacións que sexa preciso efectuar nas artes finais de gráfica e impresión dos carteis, así como a adaptación necesaria das pezas audiovisuais, todo isto de cara á súa correcta incorporación nas canles de difusión corporativas. Asumir os gastos relacionados con tales modificacións e adaptacións así como de impresión ata un máximo de 6000 €.

2. As obrigas de FADEMGA Plena inclusión Galicia serán as seguintes:

- a) A formación das persoas con discapacidade intelectual e dos familiares que van realizar as visitas aos centros de saúde.
- b) O deseño e elaboración dos carteis e vídeos de sensibilización da campaña Prepárate para entenderme.
- c) Obter a previa autorización por escrito da persoa con discapacidade intelectual ou do desenvolvemento que apareza neles -e o do seu representante legal, no seu caso-, mediante a que presta o seu consentimento para a cesión, uso e tratamento das imaxes, de conformidade co establecido pola normativa citada.

Cuarta. Comisión de seguimento

1. Constituirase, a iniciativa de calquera das partes, unha Comisión de seguimento do presente convenio formada por dúas persoas representantes de cada unha das partes, que asumirá as seguintes funcións:

- a) Impulsar e avaliar o cumprimento do convenio, propoñendo as actuacións que se consideren precisas.
- b) Interpretar, en caso de dúbida, o contido do presente convenio.
- c) Propoñer ás partes, a resolución das posibles controversias que puideran xurdir na súa aplicación.

2. Esta comisión reunirse as veces que se estimen oportunas para o cumprimento do convenio. O incumprimento por calquera das partes, das cláusulas do presente convenio, poderá dar lugar á denuncia deste.

Quinta. Inexistencia de relación laboral e obrigas do profesional

A subscrición deste convenio non suporá a existencia de relación laboral, contractual ou de calquera outro tipo entre o persoal da entidade FADEMGa Plena Inclusión Galicia que preste servizos na desenvolvemento deste convenio e o Servizo Galego de Saúde, de xeito que non se poderá esixir ningunha responsabilidade directa, indirecta ou subsidiaria polos actos ou feitos que acontezan no desenvolvemento do seu labor.

Sexta. Protección de datos de carácter persoal e dereitos de imaxe

1. No caso de que o desenvolvemento deste convenio esixa realizar actuacións que impliquen tratamento de datos de carácter persoal, o seu manexo queda suxeito ao cumprimento do establecido no Regulamento (UE) 2016/679 do Parlamento Europeo e do Consello de 27 de abril de 2016 relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (REPD); así como o resto de normativa vixente en materia de protección de datos de carácter persoal.

2. Para estes efectos, lémbrese que as partes:

a) utilizarán ou aplicarán os datos persoais única e exclusivamente conforme ás finalidades e instrucións derivadas deste convenio, e non os comunicarán ou cederán a outras persoas, nin sequera para a súa conservación.

b) están obrigadas a gardar o segredo profesional respecto dos datos de carácter persoal que trate no cumprimento do convenio, obriga que subsistirá aínda cando finalice a vixencia do mesmo.

Sétima. Financiamento

Coma xa quedou indicado na cláusula terceira, o Servizo Galego de Saúde asumirá os gastos relacionados coas modificacións a adaptacións dos carteis e pezas audiovisuais para a súa difusión nos espazos e canles corporativos, así como a impresión dos carteis, ata un importe máximo de 6 000 €, que se financiarán con cargo á aplicación orzamentaria 5001.413 A.640.1 e código de proxecto 201400033.

Oitava. Vixencia

O presente convenio terá vixencia desde o día seguinte da súa sinatura ata o 31 de decembro de 2018.

Non obstante, as partes de mutuo acordo, poderán acordar a prórroga por unha anualidade, mediante o correspondente acordo de prórroga, que deberá ser subscrito con anterioridade á data do vencemento do convenio.

Novena. Causas de resolución

Son causas de resolución do presente convenio as seguintes:

1. O transcurso do prazo de vixencia do convenio sen se ter acordado a súa prórroga.
2. O acordo unánime de todos os asinantes.
3. O incumprimento das obrigas e compromisos asumidos por parte dalgún dos asinantes.

Neste caso, calquera das partes poderá notificar á parte incumpridora un requirimento para que satisfaga nun determinado prazo as obrigas ou compromisos que se consideran incumpridos. Este requirimento será comunicado á Comisión de seguimento, vixilancia e control da execución do convenio.

4. Por decisión xudicial declaratoria da nulidade do convenio.
5. Por calquera outra causa distinta das anteriores prevista neste convenio ou nunha lei.

Décima. Réxime Xurídico

O presente convenio ten natureza administrativa e, segundo o previsto no artigo 6.1, é un negocio xurídico excluído do ámbito de aplicación de Lei 9/2017, de 8 de novembro, de Contratos do Sector Público, pola que se transpoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014.

De conformidade co artigo 4 desa mesma norma, este convenio rexeráse polas súas normas especiais, aplicándose os principios desta Lei para resolver as dúbidas e lagoas que puidesen presentarse.

As partes comprométese a resolver de maneira amigable calquera desacordo que puidera xurdir no desenvolvemento do presente convenio. As cuestións litixiosas que poidan xurdir na interpretación ou no incumprimento das obrigas que se deriven do presente convenio, e que non poidan ser dirimidas pola Comisión de seguimento creada para tal efecto, quedarán sometidas á xurisdición contencioso administrativa, de conformidade coa Lei 29/1998, do 13 de xullo, reguladora da devandita xurisdición.

Undécima. Rexistro de convenios, transparencia e bo goberno

A sinatura deste convenio de colaboración leva implícito o consentimento expreso das persoas intervinientes para que a Administración pública autonómica galega poida facer públicos os datos de carácter persoal que figuren nel, de acordo co disposto na Lei 19/2013, de 9 de decembro, de transparencia, acceso á información pública e bo goberno, e a Lei galega 1/2016, do 18 de xaneiro, de transparencia e bo goberno.

O presente convenio será obxecto de inscrición no Rexistro de Convenios da Xunta de Galicia, nos termos previstos no Decreto 126/2006, de 20 de xuño, polo que se regula o Rexistro de Convenios da Xunta de Galicia.

E, en proba de conformidade co expresado neste convenio de colaboración, asínase polas partes comparecentes, por triplicado exemplar, no lugar e data que se sinala no encabezamento.

O presidente do Servizo Galego de Saúde

O presidente de FADEMGA Plena Inclusión Galicia

Jesús Vázquez Almuiña

Eladio Fernández Pérez